



ԼՈՒՐԵՐ ԵԿԵՂԵՑԻՆԵՐԻ ՀԱՄԱՇԽԱՐՀԱՅԻՆ ԽՈՐՀՐԴԻՑ

ԵՂԽ-Ի «ԵԿԵՂԵՑԻՆԵՐԻ
ՓՈԽՕԳՆՈՒԹՅԱՆ ՈՒ ԾԱՌԱՅՈՒԹՅԱՆ
ԵՎ ԱՊԱՍՏԱՆՅԱՆՆԵՐԻ
ՕԺԱՆԴԱԿՈՒԹՅԱՆ» ՀԱՆՁՆԱԺՈՂՈՎԻ
ՀԱՎԱՔ ՍՈՖԻԱՅՈՒՄ

Ի պատասխան բուլղար օրթոդոքս եկեղեցու պատրիարք Մաքսիմ Գ-ի հրավերի, ԵՂԽ-ի «Եկեղեցիների փոխօգնության ու ծառայության և ապաստանյալների օժանդակության» հանձնաժողովը որոշել է իր առաջիկա նիստը գումարել այս տարի նոյեմբերի 28—30-ը Սոֆիայում:

Վերոհիշյալ հանձնաժողովը ծրագրել է հավաքվել ամեն տարի տարբեր երկրում, որպեսզի անմիջականորեն շփումներ ունենա տվյալ երկրի եկեղեցիների հետ և մոտիկից տեղեկանա նրանց կյանքին ու վկայությանը: Հանձնաժողովը պատասխանատվություն է ստանձնել ամեն տարի իրականացնելու տարբեր տեսակի ավելի քան 600 ծրագրեր, որոնց մեծ մասի նպատակն է օժանդակել եկեղեցիներին՝ նրանց ամենօրյա կյանքում, ինչպես նաև՝ զանազան բնագավառներում նրանց ծավալած գործունեությանը:

Սոֆիայի առաջիկա ժողովը հանձնաժողովի անդամներին պիտի թույլատրի հանգամանորեն հաշվի առնել Արևելքի եկեղեցիների հնարավորությունները:

ԴՈԿՏ. ՖԻԼԻՊ ՓՈԹԸՐԻ
ԱՅՑԵԼՈՒԹՅՈՒՆԸ Կ. ՊՈԼՍԻ
ՏԻԵԶԵՐԱԿԱՆ ՊԱՏՐԻԱՐԺԻՆ

ԵՂԽ-ի ընդհանուր քարտուղար դոկտ. Ֆիլիպ Փոթըրը 1972 թ. դեկտեմբերի 15—18 օրերին եղել է Ստամբուլում և այցելություն տվել օրթոդոքս եկեղեցու նոր տիեզերական Պատրիարք Դեմետրիոս Ա-ին: Սա առաջին պաշտոնական այցելությունն է, որ ԵՂԽ-ի ընդհանուր քարտուղարը տալիս է օրթոդոքս եկեղեցու Հովվապետին՝ իր նոր պաշտոնին կոչվելուց հետո:

Տեսակցության ընթացքում տիեզերական Պատրիարքը հայտարարել է, որ «Տիեզերական պատրիարքությունը այսուհետև ևս շարունակելու է գործուն դեր ունենալ եկեղեցիների համաշխարհային խորհրդի ծոցում»:

Վերջերս, ինչպես հայտնի է, օրթոդոքս որոշ եպիսկոպոսներ քննադատել էին օրթոդոքս եկեղեցու մասնակցությունը Էկումենիկ շարժմանը: Այս կապակցությամբ տիեզերական Պատրիարքը սույն հանդիպման ընթացքում արել է հետևյալ ճշտումը. «Մենք երբեք չենք հայտարարել, որ մտադիր ենք փոխելու մեր մասնակցության բնույթը Էկումենիկ շարժմանը, մի շարժում, որ այնքան լավ ներկայացված է ԵՂԽ-ի կողմից: Սակայն այդ չի նշանակում, որ պատրիարքությունը միշտ որդեգրելու է բոլոր այն ձգտումները, որոնք դրսևորվում են ԵՂԽ-ում... Մենք առավել կարևորություն ենք տալու ԵՂԽ-ի առաջնահերթ նպատակին, այսինքն՝ աստվածաբանության ուղղությամբ տարվող աշխատանքներին, որոնց հիմնական խնդիրն է հող նախապատրաստել իրականացնելու համար քրիստոնեական միությունը»:

Հանդիպման ընթացքում հատկապես շուշափվել է ԵՂԽ-ի գործադիր կոմիտեի կազմում ավելի շատ օրթոդոքս աստվածաբաններ ընդգրկելու հարցի անհրաժեշտությունը:

ԵՂԽ-ի «ՀԱՎԱՏՈՆ ԵՎ ԿԱՐԳԻ»
ՀԱՆՁՆԱԺՈՂՈՎԻ
ՊԱՏՎԻՐԱԿՈՒԹՅՈՒՆԸ
ՀԱՐԱՎԱՍԼԱՎԻԱՅՈՒՄ

Սերբիայի Պատրիարք Նորին Սրբություն Հերմանի հրավերով 1972 թ. նոյեմբերի 30-ից դեկտեմբերի 8-ը Հարավսլավիայում է եղել ԵՂԽ-ի «Հավատո և կարգի» հանձնաժողովի պատվիրակությունը՝ տեսակցություն ունենալու համար Բելգրադի աստվածաբանական ֆակուլտետի դասախոսների հետ:

Տեսակցության ընթացքում օրակարգի գլխավոր հարցերից մեկն է եղել վարչական և հոգևոր դրվածքը եկեղեցում, որը ներկայումս մեծապես զբաղեցնում է «Հավատո և կարգի» հանձնաժողովին: Այդ բնագավառում ձեռք բերված արդյունքները ներկայացվել են ֆակուլտետի անդամներին և սերբ օրթոդոքս աստվածաբաններին, որոնք քրեմլական ժամանակ բանաձևել են իրենց դիրքորոշումը այդ հարցում: Պարզվել է, որ որոշ կետերում երկու կողմերի միջև գոյություն ունի հայացքների հոլովություն: Սակայն կողմերը եկել են այն եզրակացության, որ որոշ բնագավառներում անհրաժեշտ են որոնման հետագա ջանքեր. եպիսկոպոսի կողմից ձեռնադրության հարցը, օրինակ, դեռևս կարիք ունի հստակացվելու:

Պատվիրակությունը Բելգրադում և Սիմսկի-Կապովսիում այցելել է Սերբիայի օրթոդոքս եկեղեցու երկու հոգևոր ուսումնական հաստատություններ, սերբ-օրթոդոքս

հոգևորականաց միության անդամների հետ ունեցել մի հանդիպում, որի ընթացքում քննության են առնվել ժամանակակից աշխարհում ընդհանուր եկեղեցու ստաջ դրված մի շարք կարևոր հարցեր:

Նորին Սրբություն Հերման Պատրիարքը երկու անգամ ընդունել է պատվիրակության անդամներին և կարևորությամբ ընդգծել Սերբիայի օրթոդոքս եկեղեցու և մյուս եկեղեցիների գործակցության անհրաժեշտությունը եկեղեցիների համաշխարհային խորհրդի շրջանակներում՝ մաղթելով միաժամանակ, որ այդ գործակցությունը խորանա:

Պատվիրակության կազմում են եղել պրոֆ. Ուրիխ Քյոհներ՝ ԳԴՀ-ի լուսերական եկեղեցուց, հայր Էմմանուել Լանը՝ հռոմեական կաթոլիկ եկեղեցուց, Ռոբեր Նելսոնը՝ Միացյալ Նահանգների մեթոդական եկեղեցուց, «Հավատո և կարգի» հանձնաժողովի տնօրեն Լուկաս Վիշերը և ուրիշներ:

